

摘藻堂四庫全書薈要

集部

欽定四庫全書薈要卷一萬八千五百八十一

集部

御選明詩卷八十一

七言律詩十四

徐階

試茉莉茶時有鄭三守之招不赴

絕域花來本自珍
露芽江水亦新分
香浮石鼎沉沉縷
清映冰壺細細紋
靜聽幾迴翻白雪
徐看一椀簇春雲
風生牕有盧仝賦
未許山翁席上聞

自三茅歸渡澱山湖即事

梯雲磴石興逶迤華舸平川晝漏遲
花底鳥過輕落瓣柳邊風弱細垂絲
隔江榜子魚為飯近水人家槿作籬
春賞此時渾不惡獨和松露寫新詩

雨後觀白牡丹

小園風日鬪清嘉夢斷揚州又此花
欲買也知金有價細評應說壁無瑕
粧憐漢女啼前見臉愧唐妃醉後誇
看到子孫須解取玉堂元不似姚家

寄題嚴學士鈴山堂

百年勝地誰為主五畝新開學士宮
曲徑影來青嶂月短牆香度紫芹風
泉聲細應絃歌入樹色輕含煙霧通
海內出雲元有望西垣堵笏思無窮

寄荅聶一川先生

煙波渺渺一舟行却算遊程歲屢更
疎懶若為酬問訊浮沉猶自愧科名
新詩浪擬張平子文賦休傳陸士衡
正是春霖人望屬卧龍滄海可無情

五塢山房為盧師陳題

茅堂四面倚層峰，曲磴迴巒路萬重。
吟榻夜涼邀月宿，書函春暖倩雲封。
畫圖髣髴容旋馬，蹤跡分明識卧龍。
我亦舊懷山水癖，卜居何日定相從。

送何復所方伯赴湖藩

仙帆渺渺隔天涯，一望秋風思不支。
閩渚有龍遺劍久，楚山無鴈得書遲。
論心漫憶陳蕃榻，揣分真慚鮑叔知。
已向丘園懷舊隱，彈冠直恐負深期。

移橘植後圃

小圃松篁野興長
更移疎橘助幽芳
欲栽豫壑為藩地
已植仍披種樹方
影近石壇思倚月
枝低茅屋畏逢霜
多情却抱他年慮
定否傍人比召棠

重過東湖書院

名區近市人知少
堂構新成我數來
春雨靜陪沙鳥坐
日長閒數砌花開
棲遲宇宙容微品
康濟朝廷屬異才
鬢白眼昏心萬轉
散愁且盡掌中杯

送同年王臯南守武岡

悵別遙瞻雙去輪
楚山燕甸足風塵
論交不獨雷陳舊
知己無憐管鮑真
盤錯聖朝資利器
焦枯遠地憶陽春
經綸自是吾儒事
莫遣龔黃解笑人

題趙大參當湖卷

一竿東去意何如
蘭芷鷗鳬共隱居
晦迹久焚封事草
遣閒聊注攝生書
鶴歸人識林逋宅
龍卧時方葛亮廬
我病正牽泉石念
從君端欲謝簪裾

贈許太宰松臯卷

崇關東下古秦墟
結屋臨關河作渠
地勝時時占貴氣
家貧事事即山居
避人几榻雲長宿
悟道庭階草不除
兩世渥恩那易報
覽圖空憶卧龍廬

山居述懷用文峯韻

竹裏松邊一徑開
水禽山鳥日徘徊
生耽野興宜長往
病畏浮名幸不才
任懶并於詩盡廢
嫁愁聊藉酒為媒
祇疑寂寞江天外
處士星明動上台

秋懷八首奉同文峯司徒用杜韻

病夫生事只山林竹樹秋來幸鬱森
花露滴枝晨細細洞雲垂地晝陰陰
時移妙達循環理歲晏偏傷伏枕心
夜漏漸長愁不寐更堪江渚拂清砧

山亭睡起日初斜獨倚涼飈惜歲華
燕塞正肥南牧馬楚江猶帶北歸槎
離心鎮日悲風葉清淚中宵感戍笳
何物年來慰幽寂紫萼黃菊有寒花

寥落江天隱夕暉碧梧庭院景霏微
林臯霜露玄蟬泣

關塞風塵白鴈飛多病久拚人事絕短才那恨世緣違
歸歟賴有城南徑不盡春來筍蕨肥

江閣新涼看奕棋蕭條不似昔賢悲三吳黍稷初豐歲
萬國車書及盛時偃仰儘能容我懶迂疎終愧報君遲
西風一度催衰白却望層霄動遠思

十載驅馳憶故山結廬新寄九峰間棲雲石竇寒猶往
得月松門夜不闕徑竹蕭疎餘晚節江花寂寞帶春顏
翻思往跡堪長嘯一事無成兩鬢斑

文淵祕閣殿東頭一別今看已再秋
白玉地高真濫跡
黃金臺古不勝愁
飛騰老愧蠅隨驥
放浪心憐鶩與鷗
聞說儲君近前席
夜來清夢繞皇州

三年經幄漫無功
撫事都歸感慨中
蠲稅已虛傳漢詔
授衣誰實獻豳風
天寒戍雪先秋白
月盛邊烽竟夕紅
眠食兩忘懷聖主
眼枯頭禿併成翁

京華北去路逶迤
潦倒歸來水一陂
入夜帆檣悲露次
移時花實戀霜枝
丘園多暇身差健
溝壑雖衰志未移

却怪杜陵如宋玉傷秋吟望各低垂

送何瑞岡尹新昌

尊酒長亭夕照前宦情離思總悽然身隨客路三千里
名在鄉書二十年作吏漫嗟山縣僻安民實藉長官賢
願從冰蘖艱難地重聽甘棠蔽芾篇

送沈宜山赴福建藩幕

青山羸馬鬚如絲千里風塵歲晏時抵鵲已憐投壁誤
烹魚兼恨得書遲官閒只好遊烏石才妙應能譜荔枝

厚祿故人慚薦達送君惟有思淒其

次張龍湖吏侍院中觀蓮四首

錄一首

十丈芙蓉白玉堂寶函金榜共輝光
摘文似出天孫杼象物宜登帝子裳
窈窕深宮看試舞氤氲祕殿憶飄香
徘徊不盡臨池意更倚層闌坐晚涼

送晁春陵太史奉使周藩

雪晴官路不飛埃梅柳津亭淑氣回
雲擁漢宮龍節下日臨梁苑鳳綸開
疏封自識親侯意專對還資用世才

營洛周公遺跡在觀遊豈獨慕鄒枚

題西湖小景

西湖一別幾經秋畫裏分明見舊遊
花隔六橋天乍遠松圍三竺地偏幽
官槎到處笙歌擁野寺連宵節蓋留
何日主恩麤報塞結廬終老白蘋洲

送司訓文三橋赴嘉興

嘉禾地接闔閭城來往風帆一日程
几杖高堂常在望文章鄰郡久知名
談經士服傳家學請外人憐陟岵情

遙識茲行能自適廣文何必羨公卿

示瓚姪秀才

身自三吳一布衣幸逢明聖到黃扉已緣多病思辭祿
久厭浮華學息機韋氏一經時所羨謝家諸少世還稀
願從勤苦承先業佇看雲霄六翮飛

九日送別茅練溪

曾勞把菊送行舟屈指今經十六秋每憶舊遊能幾在
翻令佳節迴添愁文章羨爾終當達忝竊憐予合蚤休

南去有人如問訊為言早晚到滄洲

送楊南溟太僕赴南寺

君到滁陽幾日程遠衝暑雨出神京身因旅寓悲輕別
路向炎天悵獨行朝籍漸稀同學彥故山難定共遊盟
一尊相對須成醉白髮醒時恐易生

上疏乞休呈館閣諸君子

封章曉上乞歸休長跪緘題盟手修衰病詎能忘社稷
迂疎原合老林丘正籌國事同家事敢以身謀誤主謀

願得此心天鑒取
早容蓑笠返滄洲

上疏後報達齋弟

頻年夢想在山林
此日應諧乞去心
吟對晚天神共遠
坐觀春水趣同深
種花已辦新耕地
沽酒猶存舊賜金
豫擬子由時過訪
笑歌相倚碧梧陰

乞休未報

連章未遂乞休情
猿鶴誰尋舊日盟
鄉思難消如殢酒
客懷靡定甚懸旌
虛傳大隱居朝市
實恐微才負聖明

欲作家書頻閣筆歸期何以報江城

馮南江晉秩廷尉

幾嗟留滯粵江潯歲晚西歸帶有金萬里一身臣節苦
兩年三命主恩深珂聲尚憶來驄馬袍色仍看映赤心
社稷有人知借重榮光何止被丘林

張時徹

綿州道中

雪嶺春深我正來每逢佳處一徘徊飛雲度水開還合

宿鳥驚人去復迴山缺盡將松竹補門深偏向野橋開
為言役役馳驅者何似餐霞卧草萊

清涼寺

東風吹霧曉山晴江樹青青江水平芳草盡迷鵲觀
碧雲長亘鳳皇城潮迴石壁帆光亂巖帶珠林花影明
總為青春能致客夕陽猶自聽流鶯

茅山紀遊

人間何處有仙都面面芙蓉錦障鋪靈沼巧將珠作液

瑤池真以玉為符雲中洞壑迷來往天際江湖乍有無
頃刻憑闌多變態逍遙還擬賦蓬壺

凱旋入省

去日邊城動鼓輦歸來一道凱歌齊溪前風柳無情綠
雨後山禽作意啼征旆入雲人影亂馬蹄趁草夕陽低
懷春每恨流光速轉向青山憶故栖

自洛至楚道中漫興四首

錄二首

一捧金泥下紫宸却從南國動朱輪楊花落盡仍啼鳥

江燕飛來只傍人
落日旌旗遙帶郭
清溪草樹自為春
匣中孤劍依然在
不用明時枉問津

地名

麥秀漸漸野雉鳴
僕夫遙指日南程
林間片月依孤角
馬首輕雲逐去旌
芳草自憐千里夢
青山應共百年盟
行行漸入煙花路
試向斜陽一聽鶯

次山塘驛

乘槎直上女牛邊
卜築空懷陽羨田
劍佩經年行海國
煙霞何計隱壺天
青峰不雨雲常濕
幽徑無人鹿自眠

夜半吹簫山月白應知此地有神仙

馬坤

苦雨

南國春來不肯晴陰雲接地暗山城翻風何事鸛雙下
喚雨忽聞鳩一鳴處處蠶飢吳地宴牀牀屋漏杜陵生
鶯花三月空無賴獨掩柴門對短檠

高叔嗣

再移居

僦居屢傍禁垣西曲巷重渠路轉迷萬事無能心盡懶
一官何補首常低歸衝落日時驅馬起伺朝天每聽雞
濡迹自傷非官業綸竿終有故山溪

狄冲

冒雨入白鹿

樹杪雨來風有聲肩輿且並樹邊行路傍鳥去葛花落
水面魚遊蓮葉生山接流雲多變態澗添行潦亦爭鳴
此來老子興不淺巾折衣霑踏草坪

豐坊

答俞子木見問

東海仙人枉尺書，問余宦況近何如。
青山屋上雲常起，綠柳門前葉半疎。
遣婢花間調小鳥，看兒蓮下養生魚。
秋光日日催詩興，只是幽憂病未除。

鄭旦

曉發洱海夕次濱川

天高野曠瘴煙收，風急霜繁落木秋。
箬道千盤臨戍堡，

山城百雉入邊州諸蕃樂歲休戎馬孤館頻年望斗牛
夜半角聲吹激烈紛紛涼月照人愁

蘇祐

春陰

臺館陰陰暄氣微一天風雨送春歸梁間紫燕猶私語
樹裏黃鶯却暫飛池水自牽芳草夢山人元有芰荷衣
東風好為留情在無使韶華願竟違

署中即事呈寮長諸公

日長初試越羅衣
綠晝清陰坐不違
過眼漫驚風物換
遠心翻愛吏人稀
到簾花片依苔墮
隔巷鶯聲接燕飛
追逐仙曹殊濫竊
春風自長故山薇

元夕對雪

元夕陰陰雪忽飄
春寒酒興夜偏饒
穿簾繞砌渾無賴
臨水迴燈迴自消
暗度月明花滿樹
巧隨風勢玉裁綃
長安此夜猶車馬
劇賞清歌未寂寥

予歸入倒馬關作

南風吹雨傍關來
關上千峰畫角哀
老去尚憐金甲在
生還重見玉門開
鵝絃漫引思歸調
虎節空慚上將才
聖主恩深何以報
車前部曲重徘徊

華察

答同年李仁甫寄點蒼山石

故人消息阻河關
萬里題緘淚欲潸
雲寄遠心將片石
月隨清夢到蒼山
詩成却笑窮逾拙
身退猶憐老未閒
悵望昆明池草色
春風南鴈幾時還

寄同年陸給事

著書經歲掩蓬扉江左才名重陸機宅近寒塘黃葉滿
窗開遠岫白雲飛山中春草輕朱綬夢裏晨鐘隔瑣闥
自惜蠻荒投竄後至今朝省諫書稀

送蔣戶部奉使北還

高館悲歌敞別筵使君行色在樓船九江落日明秋水
八月空山響暮蟬鄉信正逢南鴈度離心先共北帆懸
獨餘猿鶴留三徑相過徒令二仲憐

送吳內翰奉使過家北上

帝子分封禮數優，遠煩詞客下螭頭。
還家偶入青山社，戴筆仍趨丹鳳樓。
禁苑花明雙闕曙，江城楓落片帆秋。
十年無復瀛洲夢，潦倒因君憶舊遊。

屠應峻

病中東張郎中臬

閉閣經時思悄然，綠階芳草欲芊芊。
啼鶯日送千門曉，官樹晴含萬井煙。
東第綺羅淹白晝，西園桃李照芳年。

何時試共張京兆走馬章臺垂柳邊

駕幸西山

行宮迢遞接仙臺郭外驂驪羽騎來山護皇輿千嶂合
天臨宸極五雲開春留翠柳供行幄香引繁花獻壽杯
獨愧周南流滯者侍臣遙羨柏梁才

再和嚴相公詔賜直廬有作次韻

台垣奕奕紫庭西地近蓬萊瑞色齊雙觀月臨鵲鵲迴
五樓春見鳳皇樓層霄夜永傳仙漏中使時臨捧御題

為識履聲天上聽錦袍猶有異香攜

鏡光閣雨

鏡光閣在帝城邊遙控西山奠北川忽有風雲來絕塞
坐看雷雨下諸天微茫野色俱堪畫潏沆中流好放船
東下林塘更幽絕江南秋望此依然

王格

館試秋夜聞砧

蕭瑟秋風散晚涼誰家秋夜搗衣裳丁丁遙應疎鐘響

數數還如落葉忙
明月有情留小院
征鴻無數挾輕霜
不堪客夢湘雲遠
獨對寒燈思渺茫

江以達

南塘泛舟

細竹橫塘晚更幽
暖風纖月畫船遊
斜穿綠嶼輕煙散
忽送清尊碧樹稠
寂寞魚龍窺醉語
留連花鳥放春愁
杳然身世蓬瀛在
不道人間有十洲

卜居

白水青山此卜居
水光山色澹幽虛
門前亦種先生柳
地僻能來長者車
日落兒童隨杖屨
夜深松月上琴書
偶因消渴文園是
浪得虛名谷口如

田汝成

西湖遊覽

蘇堤如帶束湖心
羅綺新妝照碧潯
翠幕淺寒憐草色
華筵小簇占花陰
凌波人渡纖纖玉
促柱箏翻疊疊金
月出笙歌斂城市
珠樓縹緲綵雲深

嘉興晚發別陳子常

江南春盡落花天
桑柘籠煙水滿田
野店酒香新雨後
斷橋人渡夕陽邊
羈懷瀟灑惟歌嘯
世路崎嶇只醉眠
傾蓋逢君成坐久
片帆乘月下吳川

樊鵬

賢隱寺宴別張子言

寺門縹緲對青雲
雲裏鐘聲落澗聞
白晝蛟龍時並見
青山麋鹿晚雙羣
殿開碧霧千峰溼
窗挂香泉獨樹分

明發長安萬餘里落花尊酒暫留君

袁袞

登匡廬山

峒峒廬嶽近天都萬丈丹梯鳥道孤
樹裏泉聲飛瀑布空中煙霧起香鑪
峰形下瞰蓮花嶺江勢遙吞彭蠡湖
白鹿仙巖何處是却看五老在虛無

范言

送馮南江同年赴戍

蕭蕭夜雨共西臺惆悵雲間獨鶴回煙瘴不妨醫國手
風波須試濟川才江亭逆旅花應笑海月澄秋天自開
宣室宵衣勤夢卜馮唐萬里去還來

趙時春

留滯

留滯滄洲已浹旬鷓鴣冠終日滿風塵浮雲何事去還住
歲月無情秋復春海甸中宵來驛使天涯盡處未歸人
不堪對酒翻惆悵翠篠黃花幾度新

王慎中

寄錢洞泉以使事在嶺南

輜軒更為遠遊輕原隰光華阻使程
莫遣衣當犀瘴滅遙知句向蜃樓成
聞探仙籍朱明洞弔訪圖經趙尉城
共說交南多寶玉飲冰心膽自孤清

馮恩

趙凡夫山閣

丹樓畫閣映春陽倚檻支頤引興長
盡日花香和蘭麝

有時鶯語韻笙簧
泉流繞砌清如玉
沙帶依山白似霜
門外何人載酒至
相期明月詠滄浪

靈巖別業

村近靈巖新卜廬
小園日涉稱幽居
深篁傍屋喧晨鳥
小閣臨溪響夜魚
攜客閒遊看霧菊
尋僧清話薦霜蔬
迢然相對空林晚
揮筆詩成興有餘

送徐存齋太史入朝

河橋別思總堪憐
青雀飛飛送上天
子夜鶯花江左月

春風揚柳薊門煙蓬萊氣色輝金馬閭闔恩光照寶蓮
雞舌曉含銀管握揮毫常在聖人前

靈巖晚歸

黃葉寒蕪一望遐荒叢曲岸見微花巖頭半白分秋雨
水面輕紅逗晚霞幾片落帆停渚亂數行歸鴈度溪斜
最憐幽絕歸途趣燈火疎林傍酒家

羅洪先

歸田

疎賤何心與物猜
敝廬歸去正蒿萊
灌園漸解憎多事
種樹方知養不才
手錄道經閒自誦
門臨秋水晚慵開
過從亦有鄰翁語
又喜寬租詔令來

春遊

春日川原曉望濃
東南山色翠重重
劉伶遊計常攜鍤
陶亮歸期每候鐘
四壁有家還似寄
一身多病遂成慵
臨蹊欲問漁郎路
落盡桃花但古松

丙辰十一月六日與莆田洪元修王生養明族

叔爾相族弟惟亨至洞別去幾年矣慨然有

懷

巖栖擬遠人間世翻為山深到日稀石室雨苔還繡几
洞門秋草欲鉤衣舊林餉客穿松至幽鳥驚人遶竹飛
留謝煙霞寫青壁此身來去本忘機

東葉洞菴

江南煙艇十年餘鼓枻寧嗟未得魚淺水荻花閒自照
虛庭蕉葉卷仍舒子桑無用悲餐飯仲蔚還知愛敝廬

惟有故人稀見面
篋中時檢舊來書

唐順之

寄周中丞備禦關口

牙旗高建白羊東
鼓角殷殷漸海空
雪後錦裘行塞外
月明清嘯滿樓中
幕南五部思歸義
薊北諸軍盡立功
燕頷書生人共羨
一朝投筆去平戎

元夕詠冰燈

正憐火樹鬪春妍
忽見清輝映夜闌
出海蛟珠猶帶水

滿堂羅袖欲生寒
燭花不礙空中影
暈氣疑從月裏看
為語東風暫相借
來宵還得盡餘歡

午日庭宴

南薰應律轉朱旗
火帝乘離錦席披
榴吐千花承羽蓋
棠開五葉拂瑤墀
冰盤錯出仙人掌
金縷遙分織女絲
復道龍舟方競渡
銜恩共許向昆池

山莊閒居

身名幸自謝籠樊
白首為農誓不諼
慣住山中知鹿性

數行樹下識禽言巾車每許鄰翁借書帙閒同道士翻
醉後漸看松月上滿村雞犬寂無喧

再遊清溪莊值主人不在次韻

桃樹臨溪思不禁扁舟重問草堂陰西湖水落龜鼉石
南國霜清橘柚林壑際流泉宜稻性窗前過鹿解人心
憶君翦徑相迎處今日蓬蒿又已侵

同萬鹿園宿工文菴次韻有贈

何處尋山不厭深淡煙歸鳥暮鐘音去家百里訝如客

別爾經年尚此心
宴坐清香滋夜氣
閉門殘雪映寒林
相從一宿應堪覺
機事何須問漢陰

曉發喜峰

客心流水與爭馳
寒壘疎星度峽時
未返王孫猶草色
初來戍卒是瓜期
去鄉祇覺蟬聲似
出塞方知馬脊危
辛苦下情何計達
早年曾誦采薇詩

月下小坐書懷

滿庭圓月坐孤松
聊息塵機長道容
任俠早知同畫虎

談兵晚更笑屠龍
支離避疾猶分粟
泝泝乘時亦請封
蕙帳故山應待久
尚從長樂聽鳴鐘

廣德道中

蒼山百轉見炊煙
茅屋高栖古樹顛
細雨薜蘿侵石徑
深秋秔稻滿山田
雲中望影迷遙岫
草裏聞聲覺暗泉
儻遇秦人應不識
只疑誤入武陵川

聞復官報寄京師友人

姓名不復挂朝參
魚鳥由來性所耽
篋裏符經都已廢

山中藥草漸能諳疎狂自分三宜黜嬾病其如七不堪
深謝故人推轂意莫將陽羨比終南

崔鎮道中晚望懷陳約之

郊原極目思依依楚水連天楚樹微遠浦潮生人獨往
寒林風靜鳥雙歸泥塗自覺朋遊好日月偏催旅鬢稀
念爾同為南竄客煙波何事更相違

南苑

秦園盧橘標炎節漢苑蘘荷駐羽旂雲氣自依雕輦集

星辰故繞畫梁飛
林行草木皆成隊
水戲魚龍各合圍
更取薰風調曲奏
已看暘谷藉光輝

題張學士仰宸樓樓藏賜書

瀛洲別館切清虛
詔賜綈綌出石渠
祕典自驚墳索上
祥光遙映壁奎餘
簷前鳥下疑翻字
草際螢來為照書
借問鄴侯三萬卷
何如今日沐恩殊

送高行人使琉球

天王玉冊頒三殿
漢使星槎下百蠻
鬼國至今通象貢

樓船何處渡龍關海迷南北惟憑日雲起蓬壺忽見山
壯志不愁經歲去安流應是計程還

送王侍讀赴南都

玉堂學士賦南征躍馬鳴騶出上京奉詔明光新佩印
校書天祿早知名石頭城下春流滿白鷺洲邊芳草生
此去周南異留滯看君到處即蓬瀛

贈許太宰

卿家勲貴似諸袁兩世三登八座尊接席貂蟬開甲第

成陰桃李在公門身延白屋頻推哺官借青宮獨拜恩
天子行將問黃髮老臣何以贊嘉言

松江金澤寺四首

東南巨浸五湖深古寺維舟正夕陰客到山僧罷清磬
雀喧晴日下高林夾洲煙火三家市滿目蒹葭萬里心
徙倚不知餘興盡月明還擬聽龍吟

三江抱處勢如環野客探奇住不還一望樓臺疑海上
稍聞雞犬覺人間幸無漁父知名姓且與山僧共閉關

自笑歸來張季子春時萼葉未堪攀

何年此地開金刹宋代流傳直到今聽法石將山作幻
護經龍與水增深爐煙裊裊知塵性柏樹青青見佛心
可是攀緣渾未盡天花猶自惹衣襟

名山不用遠攀登暫借繩牀我亦僧幾樹鳴禽助禪寂
一叢修竹散炎蒸捻花不盡心傳妙對塔空將口說騰
俛仰百年成滾滾乾坤隻眼更誰曾

李開先

元夕邀客賞燈兼聽笙笛二樂

上元又是新年節
狂客高歌醉不休
橘酒生春連百爵
蓮燈照夜足千篝
風前鐵笛驚三弄
月底銀箏試一搗
聽徹落梅兼出塞
居人自是不關愁

呂高

和趙庫部元實景雲篇

卿雲郁郁覆中天
爛結緋文五色鮮
光泛紫霄流鳳蓋
影垂金闕照龍旃
漸看捧日歸仙掌
故欲從龍裊御筵

此日仙郎揮藻賦蓬萊親獻沐恩偏

陳東

送李子

山城細雨綠蕪滋黃鳥闌闌送別時
海內為鄰千里近湖邊傾蓋十年遲
蟬聲驛路催官騎草色河橋映酒旗
遙想經行多逸興逢人莫不寄新詩

任瀚

五丁峽別衡崑

峽天猿嘯萬山秋，御宿相逢轉別愁。
後會知誰先白髮，清時勞汝問滄洲。
胡牀對月此邨夜，霜杵擣衣何郡樓。
聞道西京最蕭瑟，可堪歸路曲江頭。

程文德

長洲訪常劉二子

籃輿春曉渡浮梁，懶問城闔六十坊。
小艇忽臨山盡處，美人宛在水中央。
疎籬仄徑紆邨巷，穉柳夭桃映草堂。
流寓江山元有分，翛然安土即吾鄉。

林恕

宿唐浪村

黃精釀熟豈初花
籬落蕭疎遠市譁
地僻虞羅依岸曲
天寒漁火傍江叉
燕尋舊壘穿重幕
竹引新篁過別家
對景蕭然幽興發
可甘萍梗負年華

楊祐

九日登泰山

殊方此日逢重九
絕嶽高吟散遠愁
漢時秦封空往事

紫萸黃菊自深秋
天清樓閣明三觀
野曠山河辨九州
獨是懷親憂國意
白雲滄海共悠悠

吳子孝

次韻荅衡山

積雨深添曉漲深
忘機終日狎沙禽
臨流欲濯纓無垢
繫纜頻移樹有陰
罷釣舟閒橫極浦
乞齋僧去下空林
山花盡發山翁笑
山外黃鸝遞好音

送陳給事使琉球

聖明新詔賁窮荒玉節金符下建章
萬里春風隨斗柄九天帆影落扶桑
山川盡入周王貢笳鼓先令海若藏
暫慰遠人歸欲早紫除青瑣待徊翔

蔡霰

登友人水閣

小樓掩映俯清流一片青山天際浮
有客相邀同騁望何人到此不消憂
棋聲忽訝風前落酒醖真從物外遊
最愛隱君多雅志魚罾書卷日科頭

過桑乾河入雲中

白草黃沙漠使稀桑乾渡馬駐斜暉孤城雉堞依黃土
古戍狼煙起翠微入夜角聲驚客夢凌風霜氣裂征衣
雲州一望天連水惟是山頭朔鴈飛

蔡汝楠

遊徐公子西園

西園飛蓋月中遊隨意登攀自可留門徑近連馳道樹
池塘遙接漢宮流坐看虛牖明朱轡行見深松間畫樓

一自王孫開別第鳳臺花鳥不知秋

自題前山草堂

草堂舊結北山阿
逋客還家洽薜蘿
遶院松林嵐翠重
滿庭蕉葉雨聲多
清尊自對叢花發
高枕無如啼鳥何
若道世情堪澹處
門前終日俯滄波

答岑山人見問

問余何事謝京華
遠向南州寄一家
興似步兵緣嗜酒
地如勾漏為丹砂
楓看江上三秋葉
荷挹湖中幾度花

欲識此來無吏隱
抱關仍得傍煙霞

高座寺

雲公臺榭至今留
休暇追隨訪古遊
秋色總歸紅葉寺
楚江還見白蘋洲
松林月上言彌靜
閣道鐘殘思轉幽
莫訝為郎貪佛日
官閒禪定兩悠悠

秋山積雨

湖煙漠漠草蕭蕭
湖上柴關正寂寥
絡緯吟愁連蟋蟀
梧桐滴雨間芭蕉
家園病肺誰相問
僻地驚秋不自聊

獨有沙鷗為伴侶且將心跡混漁樵

林應亮

白蓮道中

寒雲落葉見秋容客路間關思已慵
仄石懸槎難度馬空山長日只看松
家家引竹分泉溜處處因灘作水春
欲訪玉華仙隱迹清谿遙望隔芙蓉

春情

雕闌朱箔澹池塘旭日鶯啼出洞房
初服已從千蕊麗

新妝猶帶百花香
鬪成百草遺金釧
彈罷孤桐倚玉牀
更道春宵閒弄笛
相將明月舞鸞凰

蘇志臯

早朝奉天殿接詔

禁漏沉沉曉色遲
迴廊華月隱參差
玉階直接承明殿
銀漢遙通太液池
咫尺雲函頒聖詔
逶迤宮扇肅朝儀
微臣亦見天顏喜
未必長教近侍知

周復俊

三角淀中流作

東征三月滌長川汀渚芳菲接遠天
冉冉鳥飛霞外盡依依帆影鏡中懸
桃花隔岸漁舟映蘆笋穿沙水市連
東望滄溟凝紫霧西歸碣石鎖蒼煙

途次感賦

春盡南中草木賒
褰幃隨處見奇葩
洞丁出箐常牽犬
溪女穿萍共採蛙
橡葉覆田將布穀
松毛燒地欲栽茶
致身霄漢慚無術
獨對青山感物華

王梅

登滁州城

淮北淮南節候同
荒臺無限北來鴻
愁成短夢青山外
倦倚高城夕照中
雲樹不堪連海岱
商歌何處起秋風
橫塘寂寂蘋花老
欲采寒香薦醉翁

尹耕

易州道中懷古

春風匹馬經行地
落日黃金有故臺
敢謂燕昭無伯略

誰憐易水見雄才青雲不動龍山合綠樹無聲鴈影迴
千載天涯淪落客敝袍孤劍有餘哀

包節

同周岐麓臺長泛西湖遂宿藕花居

湖畔乍逢驄馬使沙行同入鷺鷥羣六橋水抱珠林月
西竺峰盤寶界雲岸柳藏鶯侵坐密園花隱麝隔溪分
况同佛院移蓮榻共息塵機理貝文

晚望即事

吏散庭閒靜掩扉
點蒼西望翠霏微
雲裁玉葉和煙潤
瀑濺珠花映雨飛
石洞經秋龍不起
松枝將暝鶴初歸
泠然忽動餐霞思
擬陟丹梯一振衣

將入京即事

歇馬津樓望禁城
鳳皇宮殿鬱雲行
遊人盡醉新豐酒
野樹羣飛上苑鶯
山扼九關開帝闕
地縈八水繞神京
風前遙度鈞天樂
疑是君王御紫清

白悅

次韻荅皇甫伯仲

雙鳳棲遲並帝京，宮梧翻葢午陰傾。
采蘋秋浦鴻初遠，伐木青山鳥自鳴。
明月溪樓誰共倚，暮雲江閣不勝情。
青霄欲問衡門樂，釣檻時看杜若生。

北固山晚眺

飛鳥林端迎虎竹，山鐘初報晚停雲。
霞迎遠浦迷帆影，潮落長堤聚浪紋。
月出中天雙鳥見，鳥歸何處一江分。
憑闌共說南泠守，脈脈今宵更憶君。

廖希顏

送方兵備赴蜀兼懷楊芳洲先生

西路元戎看仗節
南宮詞賦起明經
天門初日餘殘雪
江國浮雲伴使星
乘興還移沅溪櫂
幾時同過草玄亭
生憎楊柳催春發
故向愁邊却盡青

題南山卷

上黨諸峰紫氣通
迤南山色繞王宮
闕城萬井黃河壯
臺閣三秋白露中
長日琴樽歌有杞
徃時圭壁憶分桐

金
五
五
人
二
卷八十一
最憐深谷巖前桂偏拂賢王殿上風

三年為客向并州兩見南山屬暮秋宋玉悲時應有賦
梁王高興幾登樓爐煙孔雀新屏上花氣芙蓉別殿頭
今日賡歌樽酒裏瑤華豈少報應劉

高世彥


冬江

秋盡寒潭斂水痕斷雲殘雪送朝昏深冬野鳥巢溪樹
近渚人家掩石門何處洞簫吹夜雨一竿漁火徹朝暾

蜀江氣暖春光早已
有林花映小村



御選明詩卷八十一



總校官庶吉士臣侍朝

校對官編修臣莫瞻菴

謄錄監生臣和其聲

欽定四庫全書薈要

集部
御選明詩卷八十二

詳校官原任主事
臣 李斯咏



欽定四庫全書薈要卷一萬八千五百八十二

集部

御選明詩卷八十二

七言律詩十五

趙貞吉

宿關山

隴雲低合水分流
羌笛高吹月滿樓
乍客關山生遠夢
自憐旌節到邊州
雪消長坂黃昏度
水浸幽汀綠草抽
聞說此方泉作酒
寧將駐馬勸瑩篴

黃埧驛次壁間余方池韻

太白峰迴指大峨遙看錦水帶金波
宜男草綠沉犀浦織女星寒抱珥河
老去玄經知尚少歸來易卜買應多
春風舊著荷衣在但乞山間薜荔阿

酬馬宜泉幽居之作

雨洗池荷淨有餘聞君池上草為廬
避喧人浣桃花水聞道僧留貝葉書
雲裊鶴巢松蓋濕機忘魚筍槿籬疎
門生幾度慚秋水猶自淵沖退若虛

林廷機

九日瑯琊山宴集

此日瑯琊亦勝遊
眼中風物足清幽
青山似識重來客
白髮能禁幾度秋
萬事無如行處樂
一尊還為故人留
登臨況復逢佳節
會取黃花插滿頭

康太和

重遊觀音閣

傑閣凌嶒傍燕磯
幾回吟賞駐征騑
洪濤撼岸金鰲動

絕壁穿雲石燕飛天外三山晴歷歷江中千艇晚依依
登臨未似禪心寂笑聽鐘聲一振衣

中丞克齋李公邀飲盱眙山第一亭

第一亭開鳥道遙中丞愛客駐星輶
厓懸北斗天應近地瞰長淮影欲搖
坐久歌聲喧樹杪醉歸燈火滿山椒
回看萬籟清音薄疑有仙人弄玉簫

尹臺

送西吳張太史使江藩

京國論交幾過從
郊筵惜別奈殘冬
衝寒裘馬今朝發
獻歲鶯花若處逢
桐葉剪圭周建爵
菁茅立社漢分封
歸將錦節停鄉邑
玉笥高開紫霧重

靳學顏

草橋卽席寄以騰

舊國春深草似煙
年年此際對離筵
纔聞柳外歌三疊
已識尊前路五千
劒閣啼猿梅雨夜
錦江駐馬麥秋天
從今莫問西來鴈
縱有風翰不到川

許穀

雜興次羅贊善韻

為謝山靈莫獻嘲年來泉石許論交
開軒不剪薜蘿草上樹能窺鳥鵲巢
竹塢有風門不閉茶鐺無火石頻敲
閒中亦有關心處藥裹書籤兩未拋

送湯世登

萬里攜家上海船到時黎蜚拜車前
鯨濤蜃霧圍官舍鐵樹瓊花照酒筵
驗歲土人占草節採珠波客候龍眠

遙知問俗經過地
停旆常投飲馬錢

集沈大理次韻

青鬃仙人列九卿
錦觴邀客對春城
筵前香篆將花氣
院外松風雜鳥聲
山帶鍾陵蒼靄合
池分玄武綠波平
追歡近夜飄疎雨
歸路垂鞭信馬行

初夏偶成次薛考功韻

少日彈冠非貢禹
老來學圃似樊遲
平生愛我無如酒
凡事輸人不但棋
一畝舊臨佳麗地
四言新和考槃詩

災風朔雪年年轉
裘褐無心總不知

贈何翰林致仕居金陵次文太史韻

金馬來時動鎬京
銀魚焚後別西清
才人豈厭承明地
高士原多谷口情
買得曲池堪鬪鴨
種成芳樹好藏鶯
秦淮亦是機雲宅
鄉夢休過白苧城

雪

吳山冬盡雪初飛
極浦彤雲合翠微
越女臺邊猶黯淡
蘇公堤上已芳菲
他鄉酒盞愁仍把
虛室琴書淨可依

所願普天歌樂歲故園休問幾時歸

登五雲山

名山高擁五雲層危磴重重躡屐登西望諸天應咫尺
東來疊嶂總丘陵海門遙指三山樹梵殿常懸七寶燈
便埽蒼苔題短句乾坤高覽記吾曾

送南江馮侍御赴戍雷陽

曉聞寬詔下瑤京萬里投荒荷聖明直氣舊從雲海得
恩波今許石門行斑衣遠入黎人俗野戍時聞羌笛聲

見說天朝多雨露金雞還過五羊城

駱文盛

旅中聞鴈

西風鴻鴈惜離羣露下天高彷彿聞方訝北來衝遠塞
忽驚南去入寒雲千山落葉還秋杪一卷殘書且夜分
無那餘音更嘹唳倚樓鄉思益紛紛

劉繪

送吳祥雲赴趙總戎幕

天門昨夜耀龍文
大將橫戈正立勲
上谷不傳青海箭
漁陽新練水犀軍
金笳夜嘯樓前月
赤幟朝翻陣外雲
遠客莫辭千里去
滿堂珠履盡迎君

施峻

次宋石樓春日過訪作

停雲脉脉對春杯
宋玉招尋此日來
屋矮坐看書接棟
溪平行愛水生苔
河橋細雨舟初泊
山郭寒煙梅半開
萬里心期空歲暮
潛夫翻愧黑頭回

倚樓東徐長谷

倚樓極目思無涯
溪上幽居似浣花
未信年華欺客鬢
也知春色到鄰家
柳塘汗漫生新水
桃徑參差疊絳霞
欹枕竹牀渾欲夢
不禁啼鳥隔窗紗

寓雲居得張龍湖相公書

精舍岩堯隔翠微
我來便覺世情違
疎燈照雨簷花落
短鬢臨風木葉稀
白鴈虛疑千里信
青山容得幾人歸
詩成正在鐘鳴後
獨立空庭攬舊衣

王燦

曩時讀書龍湖春言念之因述其詩

樓接山光水接空幾年身在碧虛中
藕花蘆笋多鮮氣短笛輕舟正晚風
掩卷敲棋同羽客沿溪尋藥遇村翁
興來乘月放歌去竹暗雲深一徑通

袁煒

冬夜院中齋宿

玉堂清接禁城陰庭樹蕭蕭夜氣森
院靜風迴霜柝近

金
卷八十二
簷虛星映雪
堦深窗含殘燭
搖空影鳥禁寒枝
襍衆音
咫尺天南雲縹緲
瑤壇應候翠華臨

喻時

猗氏志懷

郇伯城孤煙火迷
魏徵祠近葦花堤
霜飛官閣書初冷
風射寒林鳥自啼
縹緲家于平楚北
寂寥人在太行西
思親夜夜驚魂夢
雲繞關山樹遶溪

獨旅逢春

江城江郭暖風吹獨旅蕭蕭物候移倚榻晝憐巢燕語
隔簾晴對海棠枝秦淮水遠空惆悵嵩嶽山高正別離
目斷紅雲半天杳不知春草碧參差

章煥

南巖宮

三十六巖何者奇南巖巖壑多幽姿飛空欲作翔鸞舞
跨澗真看渴虎垂樹杪迴欄時隱見雲中棧閣故參差
歸旌欲問來時路洞口雲深已不知

溫新

野菊

重陽不見鄉園菊
野徑折來尤可憐
為客正當嶺海外
逢花偏憶酒杯前
荒英斷葉愁相把
落日飛雲恨轉牽
兩歲佳辰俱自負
幾回欲賦不成篇

沈鍊

送張司丞有功北上

北風吹動寶刀初
短別江城念有餘
知己不因長會面

論心只欲屢題書
征帆未及春先到
鄉夢須教歲併除
君若逢人談姓字
知余京國舊交疎

答陳鳴楚社友

十年赤縣頻為吏
一疏中朝便落官
勞寄音書知夢在
細籌世路念歸難
馬蹄最識邊沙苦
鴈影猶驚塞月寒
詞客幸能憐旅況
玉門應為賦生還

寄諸生楊子中

碧柳青莎怨暮春
沙明水白更傷神
娟娟夜月當樓靜

冉冉飛花入座頻
海畔音書常阻絕
山城瘦馬苦逡巡
坐憐物色多惆悵
欲覓芳洲彩句新

茅坤

春日蹋雪彭城道中

春日獨傷春事稀
馬蹄又向雪中歸
數家煙火望欲斷
幾樹飢禽寒不飛
有客尋詩穿谷口
無人載酒款林扉
看山不覺日已暮
千里雲霏生薜衣

莫如忠

和董紫岡

頻年不復賦秋悲
秋盡江城昨始知
身向閒居寧論拙
客來問字久無奇
中廚黍熟焚枯後
小閣樽開釀菊時
聞道窺園猶懶性
肯攜吟興過東籬

柘湖還山投贈

去住無心久悟禪
獨將踪跡寄雲煙
陸沉金馬簪仍脫
市隱吳門姓不傳
白髮江湖遊倦日
青春花馬賦歸年
圖書舊有名山業
莫問蘇君二頃田

春日遊虞山

興在春山獨遠尋
行隨杖屨歷欽岑
千盤磴出花間路
百轉鶯調谷口音
石洞流雲藏窈窕
海門初日變晴陰
更臨絕巘看飛瀑
頓覺清泠洗客心

馮南江侍御赴雷陽贈別

得遂生還雨露寬
不堪顛顚復南遷
持將白日浮雲意
行盡黃茅瘴海邊
心壯此時岐路別
名高終古斗霄懸
誰嗟越絕音書滯
正憶雷陽召寇年

迴瀾臺

臺在松江第一橋外馮御史南江築

孤標遙扼郡城隈
勢枕奔濤障欲迴
迴閣憑空雲外出
環洲縮地水中來
賓游誤指招提境
童監猶呼御史臺
怪似主人能選勝
不言到海有蓬萊

喬世寧

擣衣

城上秋風木葉稀
城中思婦擣寒衣
誰憐此夜腸空斷
獨恨經年戍不歸
聲度隴雲傳玉塞
心隨關月到金微

相思更有殘機錦願逐長安一鴈飛

商南寄谿田

移家遠傍碧山廬為愛煙蘿此定居蓬卷有人時問字
洞巖深處好藏書過逢況對春宵雨晤語頻來長者車
別後更懸芝草夢關雲北望渺愁予

寄王太史元思謫戍玉壘

學士兩朝供奉年上林詞賦萬人傳一從玉壘長為客
幾放金雞未擬旋聞道買田臨灌口能忘歸馬向秦川

五陵他日多豪俊空望城南尺五天

何御

過慶原

野燒萋萋尚雨痕半山斜日近黃昏驛亭阻絕來時路
煙火蕭條戰後村倦鳥驚人移浦樹寒潮帶月上江門
長年書劍催行色肉食慙孤報主恩

陸樹聲

院中觀蓮次紅字韻

堤擁平沙玉澗東
小池花發水雲紅
繁香撲醖天初霽
涼影當軒日正中
自愛孤芳留雨露
羞教薄媚借春風
誰將瓊液叅仙鼎
持獻軒皇太乙宮

次流字韻

小築新亭傍紫丘
水晶宮外接仙流
花開似近芙蓉殿
地迴宜臨太一樓
風散舞衣香影亂
露凝綳蓋素華浮
分明二華峰頭見
謾憶瀟湘遠地秋

吳江長橋晚眺

吳越迢遙一望通
飛梁開道枕長虹
江城黯淡雲低樹
澤國微茫水接空
落日晴看歸鳥外
去帆寒泝夕流中
鱸鄉亭下尋遺跡
回首蒼波思不窮

登馮御史迴瀾臺

卜築還從選勝開
振衣長嘯此登臺
千年砥柱排流出
四野風煙入望來
舊日雷陽曾化竹
後時江閣遍栽梅
試看往蹟今猶昔
孰挽頽波百折回

再次前韻

西去茸城地望開
魏幾百尺有高臺
坐窮塵海千年勝
閱盡江流一派來
荏苒歲華還宿草
霏微寒意欲催梅
重來感舊懷賢處
悵望雲天首重回

殷邁

病懷

城闕秋生爽氣還
空堂木榻對衰顏
簾前花落常疑雨
樹裏雲過忽見山
朝隱暫隨朱紱後
心齋時住白雲間
湖南草綠浮鷗淨
愛爾忘機盡日間

董份

出郭

閒來出郭偶相從，極目田原四望通。
策馬欲趨青嶂側，聽鶯先在綠陰中。
幾家水映蘼蕪迳，一路香傳荷芰風。
風景依然似南國，可堪鄉思與君同。

王崇古

登鍾山戍樓

危樓高結跨飛虹，古塔峻嶒對梵宮。
北去關河連塞上，

西來風物自秦中
洞門暗向前山轉
石井深連幽澗通
扼險應期追一范
不堪搖落成煙空

方逢時

過天津

城頭初日亂啼鴉
客子行歌上使槎
蜃氣高連蓬島近
鴈行遙度薊門斜
河聲過雨添新漲
草色和煙翳淺沙
聞道邊庭猶苦戰
九關西望動悲笳

呂時中

靈巖寺喜晴和吳學憲

秋山雨過靜朝氛
爽氣初開散鹿羣
倚杖欲攀峰頂樹
披衣猶拂洞中雲
青天塔影當巖落
曉閣鐘聲別浦聞
自是新晴堪遠眺
擬窮丘壑到斜曛

萬衣

九日蒲圻張魏二省丈見邀

年年客裏逢佳節
今日登高復異鄉
二妙恰逢天上侶
孤臺宛在水中央
白衣似為幽人至
黃菊能如故國香

別後出關秋正杪年華旅思共淒涼

龔秉德

雨花臺眺望

崇臺縹緲出雲孤春日憑虛覽壯圖江繞潯陽遙辨楚
山連京口半吞吳秦淮風土憐今昔王謝豪華問有無
回首長干傷往事六朝煙雨半蘼蕪

李時行

寄廣陵高子通徐伯可

憶昔逢君客帝京，留連郎署十年情。
看花並醉長千里，走馬同過白下城。
春入吳宮芳草色，月明蕭寺暮鐘聲。
別來迢遞天南北，一望江湖感慨生。

趙鉞

登雲龍山放鶴亭，因暉山有約不果作。

停車暫試登山屐，羅徑周迴宿霧間。
雲淨已驚龍去遠，亭空不見鶴飛還。
千帆曉發川流穩，萬樹春回草樹閒。
覽眺何須援地主，林端一嘯且開顏。

胡安

有感

長笑何時向碧山
歲華誤落利名關
梅如輕別隨風下
潮似多情帶月還
攬鏡誰能饒白髮
開樽暫許借朱顏
欲如徐福尋蓬島
縱未長生亦得閒

秋思

袖手長吟悲路窮
綈袍不是怯西風
縱嘲小草應終出
欲賦長楊恐未工
阜帽久依遼水曲
黃冠願隱鑑湖中

菊花滿插休相笑老態還知少壯同

飲酒

菊間被酒竹間行待得雲銷看月明
莫笑郎當鮑老態已知傾倒麴生情
丹楓葉落分溪色黃鳥羣鳴雜雨聲
曉起凭闌紵衣薄秋風吹夢墮江城

客館

閒中詩卷愁中酒漫向殘春惜落花
栽柳已多陶令宅藏書將擬鄴侯家
苔痕受雨初行屐潮候兼風欲泛槎

歷歷青山湖上路似從遊子送年華

送別

洲畔蘆花到野橋曉風催浪伴歸潮醉中促月憐波淺
別後看雲恨路遙江月繞闌非故國霜華驚夢又明朝
問君鼓枻游何處閒向髯翁試洞簫

秋日閒行

蒼松偃蓋覆吾廬俯視澄潭可數魚風到乍迴流去葉
螢飛時照讀殘書西山拄笏氣應爽北海開尊坐未虛

游屐轉從雲畔入，朱門寂莫近何如。

山舍

茅屋初成蕙水濱，空思陶謝作芳鄰。
月如佳客過清夜，花似離人去隔春。
萍掩小池魚躍驟，棗垂深院鳥啼頻。
每嫌佳景多遲暮，欲問陰晴竟未真。

汪一中

送吳舍人還楚

百年心事獨依依，千里思家願不違。
燕塞夕陽孤鴈度，

荆門秋雨一帆歸，曲終江上人何處。
雲散荒臺夢已非，莫向鍾山賦搖落。
朝廷獻納似君稀。

任環

和張石川野航之作

蘆花汀畔獨移船，一曲滄浪興杳然。
已付世情流水外，遂令心事老江邊。
閒憑魚浪傳書帖，靜愛鷗沙占酒筵。
便與先生訂幽約，乘槎直欲犯青天。

徐文通

岱宗

岱頂凌霄十八盤
中原蕭瑟思漫漫
振衣日觀三秋曙
倚劒天門六月寒
風雨黃河通瀚海
星辰紫極近長安
小臣願獻蓬萊頌
閭闔高懸謁帝難

魏學禮

贈黎仲子

伊人結客少年場
芳草長亭正夕陽
忽見雙魚來萬里
始知尺素下三湘
布衣然諾輕朱建
冠蓋縱橫憶鄭莊

郢曲自來多白雪
遲君早晚賦長楊

朱曰藩

對雨東徐楊二先輩

長安飛雨灑輕埃
萬戶千門畫裏開
霧樹稍迷蓬閣觀
煙絲猶嫋建章臺
故園紅藥誰同賞
旅榻青苔客不來
莫怪殘春倍惆悵
一山風景各銜杯

清明揚州道中憶王端公

江花江草淨春煙
北望空懷乘興船
水國人家種楊柳

清明士女競鞦韆客廚未乞龍蛇火旅食頻催犬馬年
遙想風流王柱史西臺銀燭拓枝顛

飲罷逍遙館作

沙谿雨過漸通潮新漲朝來拍小橋九曲湖堂藏窈窕
數株門柳伴逍遙時魚饌客烹蘆笋海鶴驚人起稻苗
飲罷中庭不成寐夜闌河漢正寥寥

寒食

水滿春湖花滿城況逢寒食雨初晴花深不礙秋千出

水閣從教舴艋行
午憩旗亭分杏酪
夜歸錫市有簫聲
多情一樹山梨白
小立柴門待月明

涇上夕眺東友人

臺下平池池上花
春風無日不山家
紅藏塢壁攀危磴
綠浸闌干繫短查
小市漸沽寒食酒
中林長隔美人車
夕曛也戀西枝好
不管城頭已暮鴉

無題和王子新

蔥菁玉樹宮槐陌
婀娜纖腰楊柳枝
多病心情寒食後

小樓風雨落花時
陽臺永夜難為夢
洛浦微波可寄詞
何許鑒儂心
獨苦朝來青鏡有垂絲

寄升菴先生

亭花落盡鷓鴣飛
吉甫臺邊春事稀
錦水繁英添麗藻
萬山金碧有光輝
燄中僮隸傳書至
煎上人家沽酒歸
笑挈一壺江浦去
輕紅剛值荔枝肥

陳皋謨

環縣城遠眺

靈武孤城霽色開
感時還上最高臺
山樓風急熊旗動
關塞天連鳥道回
經略久寒西夏膽
安危深仗北門才
殊方獨抱懷鄉思
日暮愁聞畫角哀

劉爾牧

重陽前一日

楚天愁絕九迴腸
漢水煙波動渺茫
鴈盡北書無日到
秋深南菊為誰芳
江頭落葉催行路
峴首浮雲蔽故鄉
惆悵年來遲暮意
明朝風色是重陽

王宗沐

寄李一吾在告

蚤歲相期共挂冠，俄傳疾足竟爭先。
十年名在寧俱隱，萬里身輕始自全。
如縷茶煙依竹試，半痕紋簟傍花眠。
馳驅祇恐雄心在，對酒休歌伏櫪篇。

羅汝芳

珠溪漫興和揭傒斯

夜深銀燭坐憑闌，恍是身遊霄漢間。
香霧潭紛龍欲卧，

長林風繞鳳初還
金仙紫蓋雲中駕
玉女青螺月下鬟
錯落泉聲流底亂
夢回時作珮珊珊

張居正

觀音巖次羅念菴韻

上方重閣晚依依
飛錫何年此息機
行盡碧霄平有路
坐看紅樹不知歸
法身清淨山長在
靈境虛無塵自稀
欲借一枝棲野鶴
深公應笑買山非

舟泊漢江望黃鶴樓

楓林霜葉淨江煙錦石遊魚清可憐
賈客帆檣雲裏見仙人樓閣鏡中懸
九秋查影橫清漢一笛梅花落遠天
無限滄洲漁父意夜深高詠獨鳴舷

楊魏

沙碛驛逢劉參戎

風塵滿目塞門間
媿我書生鬢欲斑
為問干戈何日定
不知江海幾人還
河聲暮繞沙邊驛
雪色晴看天外山
全仗將軍能破敵
莫令匹馬近三關

朱大韶

和家弟韻

延閣臨湖覽眺初
條然自是碩人居
拖金不羨朝端侶
鼓楫聊為澤畔漁
萬柳凝煙新雨後
九山排闥晚風初
共知皮陸傳詩草
雅勝文園賦子虛

朱大英

再別沈嘉則得多字

殷勤子夜動悲歌
海內同心近若何
慷慨樽前同擊筑

淒涼江上一披蓑
美人有佩遺蘭芷
狂客無言醉綺羅
明日蕭蕭黃葉路
青山馬首白雲多

胡杰

九日馬西田待御讌具瞻樓

亭閣鬼鬼俯一丘
柏臺清讌復高秋
籬邊黃菊經時晚
谷口青驄竟日留
抱病有懷仍對酒
自公多暇幾登樓
臨風不用傷搖落
歸路月明山更幽

馬一龍

湖上有懷

湖上青山半入城，湖中風景坐來清。
高飛雙鶴與天近，遠去孤舟隔水明。
為客故鄉秋鴈杳，懷人落日暮雲平。
無端忽起思歸念，相對尊前共一傾。

楊繼盛

送萬楓潭少叅山東

二月江南氣尚寒，石頭城外水漫漫。
雲連削壁千屏合，日映離腸兩鑑看。
近渚晴花香細細，傍人風柳絮團團。

聖朝此際求言切補牘還思舊諫官

雪晴

疎狂忘却一身憂思入蒼生始解愁萬事無成憐我拙
百年有恨倩誰收每思北闕開宣室羞對西風泣楚囚
且喜陰雲薄欲散依稀遙見鳳凰樓

送李東明審錄北直隸

悵望霓旌拂曙暉嗟君此去故人稀南山判草更誰易
北極恩光伴爾歸晚樹喜承新雨露春風醉舞舊斑衣

漢廷此日須元禮早促仙舟赴帝闈

送徐子與讞獄江南

寥落白雲司半虛看君此去更何如西曹月滿幽人榻
南國星隨使者車塞鴈不堪行斷夕秋風況是葉飛初
秣陵故舊如相問為道疎狂病未除

周思兼

送李羅村大叅河南憲長

春風斗酒邵陵西新柳依依綠滿堤征馬不須催客去

暮猿何事向人啼道經湘水花初發夢繞漳河路欲迷
故舊那堪頻送別愁看芳草轉萋萋

劉應時

同方少叅采山登蓬萊閣望海

蓬萊閣上東南望但見乾坤一氣浮萬里波濤吞日月
十洲煙雨變春秋應疑水外無他地恍是山中有別樓
縹緲仙城定何處乘槎直欲問牽牛

寧塞山行即事

山徑盤雲水隱沙土門遙見野人家耳聞雞唱星全曙
眼望炊煙日已斜地接窮邊無寸草天臨絕域有殘霞
班生此際情何限牛斗新橫泛海槎

章美中

毗陵道中遇司勳皇甫子循舟有詩相貽奉答
三月輕風桃李陰春城吹入客愁深扁舟未遂五湖去
華髮空隨雙鬢侵芳草東歸故園色江流北轉逐臣心
煙波日暮知何處天畔疎峰相對吟

亢思謙

首夏即事

朱明新景轉皇州永日虛堂暑氣浮
南隴雨聲梅已熟西疇風煖麥方秋
古槐陰覆空庭靜細草芳連曲徑幽
翹首五雲天咫尺虞絃薰吹滿瀛洲

傅夏器

贈朱肖簡四川僉憲

樽酒相逢意未窮離亭行色更匆匆
却看燕蜀幾千里

不似朱陳共一風萬丈天梯懸日月兩涯劍水瀉玲瓏
王尊許國何愁險匹馬蕭蕭出棧中

徐學謨

松江馮咸甫進士投詩見訪短律奉贈

雲間二陸說能文屈指諸馮又見君賦就兩都占氣象
書開萬卷破紛紜登臺價為遊燕重紉佩香疑自楚分
更有華篇堪述祖先朝遺直至今聞

春正二日沈六丈暨周婁諸文學集海曙樓感

舊漫興

天與雲林便索居
閒門賓客未應疎
相攜落日登樓處
無那春風載酒初
花綻小紅寒石豔
波搖新綠綺窗虛
去年雪後逢今日
次第流光過草廬

喜宋山人夜過府署

南紀蕭疎老客星
鵝池遙憶草堂靈
蒲城何處堪攜杖
深夜相過聞扣扃
秋遠江聲寒小簟
月高鳥影在閒庭
自來公府無拘束
一任狂歌醉復醒

省僚夜集南館觀教坊樂部

一去湘江散酒徒重開蠻館夜呼盧
休憐前席心飛動且問當年興有無
老去梨園猶黑髮春來桃樹更玄都
醉看殘月催歸客誰倩玲瓏馬上扶

張四知

上已送陳子韶赴浙東僉憲

暮春燕地草萋萋冠蓋追隨漢苑西
尊酒不須臨水泛官鶯已聽隔花啼
風流遠媿山陰客麗藻新傳上巳題

況是河梁明日別離裾莫惜暫相攜

李叢

懷姚叙卿謫居

自從東郡別君侯吳楚茫茫悵遠遊
故國鶯花牽客夢大江風雨動人愁
偶緣散吏調琴鶴無復題詩上酒樓
驛騎蕭條山海隔逐臣心事兩悠悠

林命

遊定惠院和韻

言尋僧舍出東門紫菊黃橙處處村秋盡遠峰含翠靄
天寒斷岸落潮痕山中花謝臺空在亭上詩成酒續溫
不見美人湘水畔數聲漁笛欲消魂

侯祁

浮圖峪

雄關北峙萬山中天外浮圖接太空白馬遠從青海入
紫臺高與碧雲通秋風沙塞寒煙暝古戍旌旗晚照紅
自是聖朝無戰伐漢家不數貳師功

胡直

龍洲書齋新霽客至

芳洲倚樹接江城曲巷回軒霧細生弱柳窗中銜宿雨
遊絲水面帶新晴林花點草粗成字山鳥呼朋自有名
卧病一春蘿徑滿君來時復埽柴荆

錢鎮

新晴散步

自啓郊扉曳履行傍溪雲日放初晴新篁拔地已數尺

黃鳥隔林時一聲老去任情忘
檢束客來廢禮缺逢迎
家臨西塞清溪口坐看桃花錦浪生

張祥鸞

省夜

裊裊明河帶苑牆蕭蕭亂葉下微霜
風迴寒柝沉遙堞
天近疎鐘出未央共道漢庭方貴少
可知顏駟尚為郎
一官無補思田里歲晏南中橘柚黃

湖心亭晚酌

湖心亭上半虛無身在英英白玉壺涼雨初收峰似點
高雲不動水如鋪杯前芳杜青堪把檻外馴鷗近可呼
指點漁燈認歸路絕憐煙景晚模糊

花朝有約

花朝曾與故人期夜敞柴關遲所思小閣憶君同倚處
曲欄憐我獨憑時望中落日青絲騎夢裏東風瓊樹枝
可是海棠如有待春分猶自看花遲

晚春遊韋莊水亭

黃鳥關關喚友生，玉壺美酒繫絲繩。
花園亭子移時坐，水遶欄干盡日凭。
肺病忽因茲地減，鬢華奈比去年增。
懷中歸疏明朝上，吾亦江東張季鷹。

申時行

應制題扇

杏梨
白燕

羣芳爛漫吐春輝，雙燕差池雪羽飛。
玳瑁梁間寒色瑩，水晶簾外曙光微。
輕翻玉剪穿花過，試舞霓裳帶月歸。
一自銜恩金屋裏，年年送喜傍慈闈。

應制題畫二首

昂然獨立羽毛鮮
金距橫施絳幘懸
聲徹銅龍初問寢
光寒紫陌共朝天
暉暉陳寶祠神夜
咿喔秦闕度客年
會向宮庭長警旦
國風今日正思賢

右畫雞

瑩蹄驛角向東菑
短笛輕蓑跨牧兒
春雨一犁歸隴後
夕陽三徑下山時
桃林已見橐戈早
渤海休嫌賣劍遲
明主只今憂稼穡
農人處處詠來思

右畫牛

恭題畫鷹

何處蒼鷹掣錦絛霜林颯颯灑風毛搜身萬里層霄迴
側翅三秋殺氣高狡兔應還愁窟穴鸞鳩那敢決蓬蒿
聖朝祝網開三面搏擊何須借爾曹

堯堦屈軼應制

聖朝已自登元愷靈卉還能指佞臣自是乾坤扶正氣
儼如殿陛立端人觸邪似與神羊並就日常依厯草新
倘使漢庭長借爾何須請劔更埋輪

汎湖觀白蓮花

夾堤菡萏劇芬馥載酒蘭橈逗日暉千頃蔚藍迎棹破
一雙屬玉繞塘飛月明漢浦留瓊佩雲淨湘江浣素衣
容與中流看不厭夜深歌逐採蓮歸

小園初植牡丹結亭垂就忽放一花時逼長至
新除藥圃結亭臺傾國奇葩忽自開霜後著花還傲菊
春前破萼肯輸梅韶華豈為三冬借陽氣真從九地迴
敢謂青黃私綠野名園桃李漫相猜

御史大夫沈純甫邀汎南湖集真如寺

畫舸乘流錦席開招攜仍到給園來新投慧遠三生社
舊識休文八詠才抗疏功名真脫屣逃人踪跡且銜杯
相從並是忘機者湖上羣鷗莫浪猜

光福看梅舟行遇雪紀興

正憶梅花寄隴頭又看飛霰滿汀洲探奇肯負孤山約
乘興還同剡曲遊千樹著花看閬苑萬峰攢玉寫羅浮
逢春對雪饒佳興拚飲何妨十日留

落花十首

錄五
首

一年一度惜芳菲，破萼辭條轉盼中。
瓊苑乍驚飛霰白，錦林俄散落霞紅。
蛛絲罥住香猶殢，羯鼓催來色已空。
榮悴由來憑造化，飄零不敢怨東風。

名園嘉卉劇堪憐，玉褪香消倍黯然。
旖旎不禁含雨墮，輕揚無奈逐風顛。
漢宮憔悴悲顏色，韋曲蕭條感歲年。
春去春來如有恨，試將圓缺問嬋娟。

撲面窺簾故惱人，穠華能得幾回新。
漂搖逐浪渾無賴，澹蕩隨風似有因。
青鳥銜來沾綺席，紫騮嘶去踏紅塵。

呼童埽徑還教住醉客何妨吐錦茵

繁華過眼若為情獨倚雕欄數落英朱戶月來虛弄影
玉堦星隕不聞聲驚鴻洛浦遊魂遠飛燕昭陽舞態輕
幾日啼將春色換教人錯認樹頭鶯

殘英片片入塵埃芳徑迢迢遍草萊野鹿銜將溪畔過
杜鵑啼向月中來偶經別院飄歌扇忽舞前簷送酒杯
不似無情東逝水明年還逐豔陽開

落花詩後二十首

錄四首

春林飛色到晴窗，忽有殘英墮玉缸。
乍逐飄風過紫陌，還隨流水到滄江。
興闌祇覺啼鶯緩，夢斷空留睡蝶雙。
無奈倚欄頻惜別，芳心一片未能降。

洛陽如錦是耶非，欲訪名花見已稀。
宛轉依人低入幌，迢遙逐客暗沾衣。
漳河逝水愁難挽，巫峽行雲恨不歸。
獨有丹青收景色，屏幃長得漏春輝。

香霧濛濛鎖杏園，流波冉冉出桃源。
招尋藥圃頻經眼，送別荒郊幾斷魂。
彈指乍驚春黯澹，攢眉空倚月黃昏。

不須武仲長辭客羅雀年來絕埽門

良時美景鬪妖嬈繞到春深已暗飄
自與煙雲同聚散
非關風雨獨漂搖湘妃淚盡留斑竹
嬴女臺空咽紫簫
謾道上林工剪綵人間生意總蕭條

存問紀恩

十載江湖望帝閣千秋心事向誰論
青蒲諫草留蓬閣
錦軸褒章到幕門
明主笑嚔闕大計老臣終始荷殊恩
謳歌不盡華封祝更有芻蕘荅至尊

莫釐峰

莫釐千仞削芙蓉，賈勇能攀最上峰。
陡絕丹梯凌日觀，依稀玉檢護雲封。
澄湖漸隱中流楫，遠寺微聞下界鐘。
敢謂勝遊同謝傳，東山蠟屐有遺踪。

登泖塔

澄波萬頃一峰孤，雲樹煙嵐總畫圖。
八月浮槎凌汗漫，四天開閣浸虛無。
禪燈影動魚龍出，梵鐸聲高鶴鶴呼。
把酒憑欄看不厭，好將身世寄菰蘆。

再登縹緲峯

千峰雲氣俯岩堯萬壑秋聲起次寥巖岫長浮波浪出
蓬瀛不隔海天遙御風直欲凌三島捧日猶疑近九霄
莫為狂瀾頻駭目閒身久已伴漁樵

再荷存問紀恩二首

燕喜僉斯屬至尊宮廷喜慶藹乾坤老臣聽詔曾扶杖
使者銜綸又及門咫尺威顏如晝接殷勤天語自春溫
當年袞職慙無補何意頻叨聖主恩

一從揆路謝簪裾兩荷君王問起居
林卧尚承三錫寵
袞袞仍拜十行書
江湖跡遠丹心在霄漢恩長白髮疎
易轍調弦今日事
葵衷欲獻轉躊躇

遊金山二首

青螺丹鷺結氤氲
振策凌高破夕曛
千地樓臺孤嶼出
萬家城市兩涯分
峯前夜汲中泠月
渡口晴披北固雲
徙倚江天頻送目
煙波愁思轉繽紛

巨鼇曾擁六龍遊
今古名區日夜浮
拔地孤峯凌上界

擎天一柱砥中流
山腰閣枕龜鼉窟
海口湖吞鴈鷺洲
四起風波還自定
法輪長鞏帝王州

北固山

宛轉籃輿入翠微
峻嶒孤嶂出煙霏
江間洲渚紫如帶
石上藤蘿曳作衣
樹色深依山霧合
鐘聲遙共白雲飛
金焦對峙成三島
倘許蓬壺著釣磯

遊焦山

江天鼓棹入林皋
勝地攀緣興轉豪
帆影亂飛京口渡

灘聲驟激海門濤布金法界棲雲淨浮玉仙巖架壑高
石壁題留俱幻跡摩挲讀遍首頻搔

又登天平山

十年五度到天平靈壽初攜賜杖行丹壑長留松檜色
白頭偏繫薜蘿情盤紆樹杪雙林出卓立雲端萬笏迎
更向層雲攀絕頂吾將此地學無生

贈大叅馮元成

才名蔚起縉雲司使轍曾勞萬里馳指顧山川歸品藻

巡行郡國仰風儀一官玩世終投隱十載還家始及耆
閑戶祇今多著述山中日月為君私

許孚遠

黃村塔院歸途遇雨宿舟中

山行雲氣滿羅衣忽向黃村失翠微自愛良朋五湖集
不妨夜雨一蓑歸身隨鷗鳥眠俱穩歌發陽春和更稀
賸有漁燈破清曉蒼煙白露共依依

登南高峰夜歸湖上

杖藜扶醉躡層空
吳越江山一望中
南渡樓臺餘宿草
西陵杉桂動秋風
煙消野寺鳴孤鶴
日落滄洲度遠鴻
歸向湖心吟夜月
一蓑瀟灑即漁翁

劉壁亭年丈招飲舟中

樹影離離河水流
使君載酒泛滄洲
捲簾倏過千山雨
隱几蕭然六月秋
天地幾人愁
逆旅風波何處話
扁舟夜來獨向前
汀宿鷗夢蘋香兩自愁

王叔杲

初冬登大伾山

初冬飛蓋拂晴雲共陟嵯峨探秘文河勢已非神禹鑿
山形還是太行分崖端想像懸金粟洞口虛無散紫氛
登眺壯懷聊此寄酒闌歸路已斜曛

東平道中呈竹巖叔父

古塹寒風吹旆旌星軺歲晚尚南征殘燈幾點遠村暝
霜月滿空孤鴈鳴戀闕猶懸頻夜夢到家應記隔年程
東山叢桂虛凝望尚作驅馳萬里行

清明日過碧雲寺

佳節登臨興未闌，停驂山寺一盤桓。
千厓霽色初融雪，三月花枝尚怯寒。
風靜波光涵碧落，月明松籟雜清湍。
竭來未遂耽幽趣，回首紅塵走馬看。

穆文熙


月下聞鴈

岸幘池亭共酒杯，蕭然秋氣正悲哉。
高城落木臨風下，遠塞新鴻向月來。
遊子荷裳堪自緝，班姬紈扇未須裁。

塵心種種歸無語
坐看天南斗柄迴



御選明詩卷八十二



總校官庶吉士臣侍朝

校對官編修臣莫瞻菴

騰錄監生臣和其聲